



156

DEO OPTIMO MAX.

UNI ET TRINO,  
VIRGINI DEI-PARÆ, ET S. LUÆ.  
Orthodoxorum Medicorum Patrono.

QUÆSTIO MEDICA,

QUOD LIBETARIIS DISPUTATIONIBUS,  
*manè discutienda in Scholis Medicorum, die Lunæ vigesima-tertiâ  
mensis Martii, Anno Domini M. DCC. L.*

M. RAYMUNDO DE LA RIVIERE,  
Doctore Medico, Præside.

*An in morbis Melancholicis purgatio per inferiora?*

I.



LANDISSIMUM vitæ condimentum sanitas ;  
absque eâ nulla naturæ, nulla fortunæ bona ; lon-  
giùs ab eâ recedit qui mente laborat, quàm qui  
ægrota corpore. Cunctis hominibus eadem Animæ,  
ut ita dicam, fabrica, ingenium non cunctis idem.

Hujus varietas ab Organorum conformatione & humorum dif-

A

2

positione pendet, sicut morborum diversitas. Tenuis humor ut plurimum acutos parit, crassus chronicos. Inter chronicos reponitur Melancholia, quæ mentis alienatio est sæpissimè cum metu & tristitiâ conjuncta. Hunc affectum generat obscura cerebri dispositio, cum pravâ sanguinis indole & partium inferiorum vitio. Suspirium frequens, somnia terrifica, silentium, demissio animi, desidia, hebetudo, oblivio, lucis fuga, contemptus rerum omnium hanc comitantur ægritudinem. Hæc omnia arguunt crassi ac terreni humoris dominium.

I I.

**A**NIMÆ proprium est cogitare. Inter eam & corpus insigne societatis vinculum. Ex diversis partium corporis motibus variæ exurgunt in Animâ cogitationes, & vice versâ distinctæ cogitationes distinctos motus edunt in corpore. Mutuus ille concursus ex summi Opificis decreto proficiscitur. Animi pathematis occasionem præbet humorum natura. Gaudium à laudabili sanguine & mediocriter subtili, dum blando ejus motu cerebrum placidè commovetur, undè grata animæ cogitatio. Furor, Ira, Audacia rapidissimum bilis motum sequuntur. Mœstus & tristis est qui non posse se putat imminens malum arcere, aut optatum bonum consequi, propter imbecillitatem virium, motus inertiam, membrorum segnitiam. Undè hæc, nisi à sanguine fœculento, melancholico, vix mobili, spiritus ejusdem indolis suppeditante?

I I I.

**C**ORPUS humanum ex infinitis penè numero canaliculis unum efficitur. Per hos varii liquores trajiciuntur, quorum alii utiles, alii excrementitii. Illos sursum, si tenues, deorsum, si crassi, Natura propellit. Ne credas tamen partes inferiores spiritu orbari; hic per nervos delatus actionum cujuslibet partis primus auctor jure ac meritò censetur. A debito istius influxu liquores corpori inservientes justam subeunt partium miscelam, eaque mole & quantitate procedunt quâ recto consulatur usui; omnia tunc ritè peraguntur: secus, corporis economiam inturbant, pervertunt, dirimunt; morbus adest. Quo quidem in casu morbi natura, partium conditio, earum situs indicant re-

3

medii formam , & quâ viâ sit eliminandus humor. Debet enim Medicus naturæ Minister & imitator illius motum sequi. Sic tenuis humor si peccat , sive per habitum corporis quò fertur , sive per superiora est abigendus , crassus per inferiora.

I V.

**Q**UO vividior alicujus corporis motus , eò magis à centro recedit , motûs sui impedimenta faciliùs superat , & lineam rectam describit undè sanguinis à sinistro Cordis sinu prompenti tenuior portio ad caput avolat , crassior pellitur ad inferiora. Hujus terreni succi sedes est ac receptaculum Vena Portæ , ramis suis per lienem , mesenterium & intestina sparsis lentissimo gradu sanguinem resorbens. His adeò obstructis vasisbus moles sanguinea à succo melancholico non repurgatur , hinc circuitu sanguinis fæx illa rapitur , ad diversas deindè corporis partes , in quibus innumera tum symptomata ludit , jugiter appellenda. Tot malorum curationem , naturâ monstrante viam , prudenter aggredierur qui confugiet ad catharticum , sectâ priùs saphenâ , & præmissis blandis solventibus saponaceis : hâc semitâ quâ spontè fertur crassus humor , citiùs tutiùsque foràs educitur.

V.

**O**BSCURE loquitur qui catharticum sympathiâ aut antipathiâ agere contendit ; clariùs , qui affirmat idem irritando purgare , & novam excitando in humoribus fermentationem , seu motum intestinum , quo à vinculis quibus impediuntur eorum particulae , extricentur. Undè ab Emeticis Cathartica multùm discrepant , nempe quòd illorum evolutio fiat tantùm in ventriculo ; horum dissolutio inchoetur in stomacho , perficiatur in intestinis. Emerica constant particulis tenuibus & effervis , motuque concitatissimo præditis , cerebrum lædunt vehementi concussionem , partibus superioribus humorem melancholicum impingunt potiùs quàm ex iis eliminant ob angustiores meatus vacuandis succis crassioribus ineptos : deindè verò nusquàm suscitatur vomitus absque periculo. Quæ per inferiora purgant , minorem vim inferunt corpori , humoris vacuationem naturæ consentaneam moliantur per vias corporis patentiores , aptioresque expulsionem

crassioris excrementi : à principibus partibus humorem noxium remouent , sedem morbi oppugnant in ipsomet sitam abdomine.

*Ergò in morbis Melancholicis purgatio per inferiora.*

## DOMINI DOCTORES DISPUTATURI.

*M. Claudius Person.*

*M. Joannes-Stephanus Guettard , Regia Scientiarum Academia Socius , Censor Regius & Serenissimi Aurelianensium Ducis Botanicus.*

*M. Joannes Astruc , salubris Consilii Regis Socius , Regis Poloniarum Augusti Secundi Electoris Saxonia , dum viveret , Medicus Primarius , & Professor Regius.*

*M. Ludovicus - Renatus Desbois.*

*M. Natalis-Maria de Gevigland.*

*M. Bernardus de Jussieu , Regia Scientiarum Academia , Regique Societatis Londinensis Socius , & in Horto Regio Botanices Prodemonstrator.*

*M. Carolus - Ludovicus Liger.*

*M. Franciscus-David Hérisant , Regia Scientiarum Academia Socius & Chirurgia Professor designatus.*

*M. Joannes-Baptista Boyer , Regis Consiliarius Medicus in supremo Senatu ac in Praefectura Parisiensi , Serenissima Cenomanensium Ducissa Medicus Ordinarius , Censor Regius , Regia Societatis Londinensis Socius , & utriusque Pharmacia Professor designatus.*

Proponebat Parisiis , JOANNES MAC - MAHON ; Laonensis in Hiberniâ , Doctor Medicus Remensis , ultimo saviente Bello , Medicus Exercituum Regis ad Rhenum , Neo-Brisaci in Nosocomio Regio Medicus Ordinarius , necnon Saluberrimae Facultatis Medicinæ Parisiensis Baccalaureus , A. R. S. H. 1750 , à sextâ ad meridiem.